

Te Kopara.

NAMA I.

GISBORNE.

OKETOPIA 1913.

"Iti te Kopara, kai takirihiri ana i runga i te Kahikatea."

KI TE IWI.

E HOA MA, TENA KOUTOU. He tangi atu tena, he maimai aroha ki ta koutou manu, ki te *Pipi-wharauroa*, ka mutu nei tona hokihoki ki te toro mai i nga wahi katoa o Aotearoa nei, o Te Waipounamu, o Rangiora, o Wharekauri. Ka maha nei ona tau i rere mai ai i tona whenua tawhiti me te puta tonu o tana karanga,

"Kui, kui, kui, whiti, whitiara."

Te tikanga o taua reo ona ko nga mea i kohia mai e ia i tawhiti e mauria mai ana ki enei motu tahorohoro ai ki te aroaro o te tokomaha. Kotahi rawa tona mate, he mate-kai; he mahara-kore no te hunga e manawareka ana ki nga taonga i tuwhaina nei e ia. He hunga tokoouou ano ia i manaaki i a ia, i pera me te mahi a tera manu iti, a te riroriro, e whakaputa nei i te aroha ki te manu mai o tawhiti, i awhi nei i ona hua, e whakaputu ake nei i ana tamariki.

Kua kore nei tera o a koutou manu e torotoro i a koutou, ko ahau tenei, ko *Te Kopara*, i ngaro i Aotearoa nei i etahi o nga tau kua pahure ake nei, kua hoki inaianei ki nga motu ngahere i taka ai i mua, me te hiahia ano ki te kawhe korero ki nga wahi katoa. "Mate atu he tetekura, whakaete mai he tetekura." Otira ma koutou e manaaki mai. Tena hoki ta mua ki, "Whakaanewarua marie ana he kai, ka mate te wairua."